



KERAJAAN SERI PADUKA BAGINDA

MALAYSIA

PEKELILING PERKHIDMATAN BIL. 5 TAHUN 1987

**NILAITARAF BARU BAGI KELAYAKAN IJAZAH SARJANA MUDA
DALAM BIDANG PENGAJIAN ISLAM DAN YANG BERKAITAN DARI
LIMA BUAH UNIVERSITI DI REPUBLIK ARAB MESIR**

1. TUJUAN

1.1 Tujuan Pekeliling Perkhidmatan ini ialah untuk memaklumkan nilaitaraf baru bagi kelayakan Ijazah Sarjana Muda dalam bidang Pengajian Islam dan yang berkaitan dari Universiti-universiti Al Azhar, Kaherah, Alexandria, Ain Sham dan Assiut bagi maksud lantikan ke jawatan-jawatan yang bersesuaian mengikut skim-skim perkhidmatan Kerajaan.

2. NILAITARAF KELAYAKAN YANG PERNAH DILULUSKAN

2.1 Kelayakan Ijazah Sarjana Muda dalam bidang Pengajian Islam dan yang berkaitan dari Universiti-universiti Al Azhar, Kaherah, Alexandria, Ain Sham dan Assiut, dahulunya telah diiktiraf serta diberi nilaitaraf oleh Kerajaan seperti berikut:

- (a) Ijazah Sarjana Muda diiktiraf setaraf dengan Ijazah Sarjana Muda (BA) Am/Lulus dari universiti-universiti tempatan; dan
- (b) Ijazah Sarjana diiktiraf setaraf dengan Ijazah Sarjana (MA) dari universiti-universiti tempatan dengan syarat memiliki ijazah pertama yang diiktiraf oleh Kerajaan.

2.2 Berdasarkan kepada pengiktirafan dan nilaitaraf di atas, pemegang-pemegang kelayakan Ijazah Sarjana Muda dalam bidang Pengajian Islam dan yang berkaitan dari 5 buah universiti yang berkenaan adalah layak dipertimbangkan untuk lantikan ke jawatan-jawatan Kumpulan 'A' yang mensyaratkan Ijazah Sarjana Muda Am/Lulus sebagai kelayakan masuk minima. Untuk jawatan-jawatan Kumpulan 'A' lainnya yang mensyaratkan kelayakan masuk di peringkat

Ijazah Sarjana Muda Kepujian, siswazah-siswazah yang berkenaan layak dipertimbangkan untuk lantikan sekiranya memiliki kedua-dua Ijazah Sarjana Muda dan Sarjana.

3. NILAITARAF KELAYAKAN YANG BARU

3.1 Kerajaan telah mengkaji semula nilaitaraf kelayakan Ijazah Sarjana Muda dalam bidang Pengajian Islam dan yang berkaitan dari Universiti-universiti Al Azhar, Kaherah, Alexandria, Ain Sham dan Assiut, dan seterusnya bersetuju menetapkan *nilaitaraf baru* kelayakan ijazah berkenaan seperti berikut:

- (a) Ijazah Sarjana Muda Syariah dan Undang-undang (Undang-undang Perbandingan) (program 5 tahun) dari Universiti-universiti Al Azhar, Kaherah, Alexandria, Ain Sham dan Assiut diiktiraf setaraf dengan Ijazah Sarjana Muda Kepujian dari Universiti-universiti tempatan;
- (b) Ijazah Sarjana Muda dalam bidang Pengajian Islam dan Bahasa Arab dari Universiti-universiti Al Azhar, Kaherah, Alexandria, Ain Sham dan Assiut (program 4 tahun) diberi nilaitaraf mengikut peringkat-peringkat pencapaiannya seperti berikut:
 - (i) pencapaian peringkat *Jayyid* dan ke atas diiktiraf setaraf dengan Ijazah Sarjana Muda Kepujian dari Universiti-universiti tempatan;
 - (ii) pencapaian peringkat *Maqbul* diiktiraf setaraf dengan Ijazah Sarjana Muda Am/Lulus dari Universiti-universiti tempatan.

4. PERLANTIKAN, GAJI MASUK DAN TARIKH KUATKUASA

4.1 Dengan ketetapan nilaitaraf baru ini, hanya pemegang-pemegang kelayakan Ijazah Sarjana Muda Syariah dan Undang-undang (Undang-undang Perbandingan) atau Ijazah Sarjana Muda dalam bidang Pengajian Islam dan Bahasa Arab dengan pencapaian sekurang-kurangnya di peringkat *Jayyid* layak dipertimbangkan untuk lantikan ke jawatan-jawatan Kumpulan 'A' yang bersesuaian dalam Perkhidmatan Awam yang mensyaratkan kelayakan masuk minima Ijazah Sarjana Muda Kepujian (contohnya jawatan A20) dengan gaji permulaan \$1,000/- sebulan. Mereka yang berkenaan juga sekiranya memohon jawatan-jawatan Kumpulan 'A' yang lain yang memakai Skim Perkhidmatan Ijazah Am (contohnya A22) layak dibayar gaji permulaan Ijazah Sarjana Muda Kepujian dengan syarat skim tersebut juga ada memperuntukkan kelayakan masuk di peringkat Ijazah Kepujian. Mereka juga sekiranya memiliki Diploma Pendidikan yang diiktiraf oleh Kerajaan boleh dipertimbangkan untuk lantikan sebagai Pegawai Pelajaran, Kategori 'DI'.

4.2 Bagi siswazah-siswazah lain yang memperolehi Ijazah Sarjana Muda di peringkat *Maqbul*, pertimbangan lantikan adalah berdasarkan kepada nilaitaraf Ijazah Sarjana Muda Am/Lulus sahaja.

4.3 Penetapan gaji masuk berasaskan nilaitaraf baru kelayakan-kelayakan berkenaan yang ditetapkan pada taraf Ijazah Sarjana Muda Kepujian adalah berkuatkuasa mulai dari 1hb April, 1987.

5. PENYESUAIAN GAJI PEGAWAI SEDANG BERKHIDMAT

5.1 Pegawai-pegawai yang sedang berkhidmat dalam mana-mana jawatan Kumpulan Gaji A22 yang memiliki Ijazah Sarjana Muda Syariah dan Undang-undang, (Undang-undang Perbandingan) (program 5 tahun) atau Ijazah Sarjana Muda Pengajian Islam dan Bahasa Arab pada peringkat Jayyid dan ke atas dari 5 buah universiti yang berkenaan yang masih menerima gaji lebih rendah daripada \$1,000/- sebulan dan dilantik sebelum 1hb April, 1987 hendaklah diselaraskan gaji mereka kepada matagaji \$1,000/- mulai 1hb April, 1987. Tarikh kenaikan gaji pegawai-pegawai sedang berkhidmat yang dilantik sebelum 1hb April, 1987 adalah dipinda seperti di *Lampiran 'A'*.


5.2 Bagi pegawai-pegawai yang dilantik pada atau selepas 1hb April, 1987, gaji masuk mereka juga hendaklah diselaraskan ke matagaji \$1,000/- sebulan. Tarikh kenaikan gaji mereka adalah ditetapkan mengikut Perintah Am 45, Bab A.

6. BAYARAN TUNGGAKAN

6.1 Dengan pelaksanaan Pekeliling Perkhidmatan ini, tunggakan boleh dibayar secara sebenar mulai dari 1hb April, 1987.

7. AM

7.1 Jika terdapat apa-apa keraguan semasa melaksanakan Pekeliling Perkhidmatan ini, Ketua-ketua Agensi adalah diminta supaya menghubungi Urusetia Penilaian dan Pengiktirafan Kelayakan di Jabatan ini.



(TAN SRI DATO' ALWI JANTAN)
*Ketua Pengarah Perkhidmatan Awam,
Malaysia*

Tarikh: 11hb September, 1987.

Semua Ketua Setiausaha Kementerian.

Semua Ketua Jabatan Persekutuan.

Semua Y.B. Setiausaha Kerajaan Negeri.

Setiausaha, Suruhanjaya Perkhidmatan Awam, Malaysia.

Urusetia Suruhanjaya Perkhidmatan Awam Malaysia, Sabah.

Urusetia Suruhanjaya Perkhidmatan Awam Malaysia, Sarawak.

Setiausaha, Suruhanjaya Perkhidmatan Pelajaran, Malaysia.

Pengarah Jabatan Perkhidmatan Awam Cawangan Sabah.

Pengarah Jabatan Perkhidmatan Awam Cawangan Sarawak.

Pihak Berkuasa Badan-badan Berkanun Persekutuan.

Pihak Pengurusan Kuasa-kuasa Tempatan.

PINDAAN TARIKH KENAIKAN GAJI BAGI PEGAWAI-PEGAWAI
YANG DIBERI PEMINDAHAN GAJI DARI TIGA MATA DALAM
TANGGAGAJI SEKARANG KEPADA SATU MATA DALAM
TANGGAGAJI BARU MULAI 1 APRIL, 1987

*Tarikh Kenaikan
Gaji yang Baru*

- | | |
|--|-------------------|
| (i) Pegawai yang menerima tanggagaji yang tinggi pada: | |
| 1 April, 1986 kepada 30 Jun, 1986 | 1 Mei, 1987 |
| 1 Julai, 1986 kepada 30 September, 1986 | 1 Jun, 1987 |
| 1 Oktober, 1986 kepada 31 Disember, 1986 | 1 Julai, 1987 |
| 1 Januari, 1987 kepada 31 Mac, 1987 | 1 Ogos, 1987 |
| (ii) Pegawai yang menerima tanggagaji yang tengah pada: | |
| 1 April, 1986 kepada 30 Jun, 1986 | 1 September, 1987 |
| 1 Julai, 1986 kepada 30 September, 1986 | 1 Oktober, 1987 |
| 1 Oktober, 1986 kepada 31 Disember, 1986 | 1 November, 1987 |
| 1 Januari, 1987 kepada 31 Mac, 1987 | 1 Disember, 1987 |
| (iii) Pegawai yang menerima tanggagaji yang rendah pada: | |
| 1 April, 1986 kepada 30 Jun, 1986 | 1 Januari, 1988 |
| 1 Julai, 1986 kepada 30 September, 1986 | 1 Februari, 1988 |
| 1 Oktober, 1986 kepada 31 Disember, 1986 | 1 Mac, 1988 |
| 1 Januari, 1987 kepada 31 Mac, 1987 | 1 April, 1988 |